

Tokom naredne sedmice stručni konsultant će pregledati, a nakon toga će uprava Rudnika Banovići odabrati najpovoljniju ponudu za izgradnju termoelektrane Banovići.

Prema riječima Munevera Čerģića, direktora Rudnika mrkog uglja Banovići, tri kineske kompanije su ponudile finansiranje i izgradnju termoelektrane jačine 350 megavata (MW). Riječ je o kompanijama Shanghai Electric Group Ltd, China Gezhouba Group Company Ltd. i Dongfang Electric Corporation Ltd. On je dodao da nije tačna informacija koja je u medijima prenesena da je cjenovno najpovoljnija ponuda kompanije Shanghai Electric Group. Za Oslobođenje je kazao kako je redosljed kompanija, prema ponuđenoj cijeni: Dongfang, zatim Shanghai, te China Gezhouba. Sve ponude se kreću oko 490 miliona eura i razlika je u nijansama.

Bodovanje

“Sada vršimo pregled ponuda. Ne znači da je najniža cijena ujedno i najpovoljnija ponuda. Ponuđačima je ranije rečeno šta će se bodovati, a to su ekonomski i tehnički parametri”, kazao je Avdija Mumić, rukovodilac službe za izgradnju TE Banovići.

Prema njegovim riječima, ekonomski parametri obuhvataju cijenu i učešće domaćeg sektora u izgradnji termoelektrane. Naime, prema postavljenim kriterijima, najmanje 20 posto posla moraju obaviti domaće kompanije, a riječ je o građevinskim i monterskim radovima.

Što se tiče tehničkih parametara, najviše pažnje posvetit će se kvalitetu opreme. Nije navedeno kao uslov gdje oprema mora biti proizvedena i ko je proizvođač opreme jer sve ove kompanije uglavnom proizvode opremu i logično je da je najpovoljnije da ugrađuju vlastitu opremu.

Nakon što uprava Rudnika izabere najpovoljnijeg ponuđača, izvještaj će biti upućen Vladi Federacije BiH i Parlamentu, koji trebaju dati saglasnost na izbor najpovoljnije ponude, što bi u konačnici trebala potvrditi i Skupština preduzeća. Nakon toga slijedi sklapanje ugovora sa bankama o finansiranju projekta. Svaka od kompanija koja se prijavila za finansiranje i izgradnju TE Banovići već ima banke sa kojima sarađuje na ovom projektu, dakle, finansiranje je obezbijeđeno, mada se o uslovima finansiranja još može pregovarati.

“Plan je da u maju naredne godine počne izgradnja termoelektrane, koja bi trebala biti završena za 40 mjeseci, tako da se početak rada novog postrojenja može očekivati u 2019. godini”, rekao je Mumić.

Blok 6

S obzirom na to da skoro svu proizvodnju uglja iz Banovića troši Blok 6 Termoelektrane Tuzla, koji će uskoro biti isključen, a zamjenski Blok 7 planiran je na lignit, Rudnik mrkog uglja Banovići za nekoliko godina ostaće bez tržišta.

“Banovići proizvode oko milion tona uglja, kada se isključi Blok 6 mi nećemo imati gdje

Tri kineske kompanije spremne finansirati i graditi TE: Termoelektrana je spas za Banoviće

plasirati pola miliona tona uglja, što će značiti kraj za rudnik u Banovićima, otpuštanje radnika, odnosno kraj za općinu Banovići. Zato i ovu termoelektranu u Banovićima smatramo zamjenskim postrojenjem, koje će koristiti ugalj koji je do sada koristio Blok 6 TE Tuzla”, kazao je Mumić.

Ova termoelektrana bi trebala proizvoditi 2.047 gigavat-sati (GWh) električne energije godišnje.

izvor: oslobodjenje.ba